



## 寫大字

細姑丈係民國三十八年跔國民政府來臺灣个阿兵哥，退伍過後就轉做教書个先生。佢係安徽人，講話有盡重个外省腔，毋知厥學生仔聽得識佢講个話無？佢斯聽無麼識，故所佢盡驚伸佢一個人聽佢講話，驚佢聽差咗，會應毋著話。佢最記得細姑丈盡好教佢等這兜細人仔寫大字。

每擺奈熱恁久長个時間，佢等姊妹就像去環遊世界樣仔，到親戚屋下這歇幾日仔、該歇幾日仔，就恁仔拖過長長兩個月个暑假。到細姑媽(o' ba)屋下時節，細姑丈毋會分佢等騎腳踏車野上野下，也毋會分佢等去細圳溝釣蚵仔，淨會喚佢等看書，無就寫大字。

其實到佢讀小學時節，市面上早就有賣歸罐仔个墨水，毋過，細姑丈愛佢自家搗墨。細姑丈个墨條項有刻一條金龍，搗核一截該尾毋見核咗；墨臺應該也蓋有歷史，既經凹(au')一個窟咗。佢拿等墨條，對墨池撥(bad')一息水到墨臺，定定仔搗，定定仔搗，墨條愛拿直直，做毋得搗忒遽，將水搗啊變成醃醃个墨汁。

細姑丈个棉紙一大疊，係長長大大張，無畫格仔，佢又教佢愛自家拗格仔線。佢講，字畫愛留天同地，天高地寬，故所天又愛比地留過闊息兜。留好咗天地，中間對拗再對拗，摺出一條一條个線來。

細姑丈个毛筆係寫大楷用个，寫起來正式係「寫大字」。細姑丈會搭等佢个手，一筆一畫教佢練習「永字八法」，點、橫、直、勾、挑、撇、捺，寫到鰲梨鬬瓜佢也毋會譴，佢聽毋識佢个外省腔，淨知啊照等像畫符誥。佢盡有耐心一遍又一遍教佢寫，就恁仔過咗一下晝。

前幾年仔書法教育差一息廢核，國小學生仔毋使寫大字，實在蓋無採！佢永遠記得還細時節，細姑丈教佢寫大字，搗墨、拗紙，係何等文雅个動作！細人仔心性活跳，寫大字做得訓練細人仔恬靜，專心做好一件事情，希望這下又開始重視還來得掣。

作者：吳秀梅

### ☆詞彙學習☆

【寫大字】xia` tai sii：寫毛筆字。

【醃醃个】neu` neu` ge：濃濃的。

【野上野下】ia' song' ia' ha'：在外到處遊玩、無人管束的樣子。

【鰲梨鬬瓜】ngau` li' fe` ga'：歪七扭八的樣子。

【釣蚵仔】diao guai` e'：釣青蛙。

【符誥】pu` gau：符咒。

【歸罐仔】gui' gon e'：瓶裝、一整罐的。

【活跳】vad tiau：活潑。

### ☆文法學習☆

【聽無麼識】tang' mo` ma` siid'：聽不太懂。「無麼」是「無麼个」的簡語，字面義為「沒什麼」，在這邊則做為程度副詞，表示「不太、不怎麼」。

例：飯鑊肚个飯無麼罇，煮兜仔麵食愛無？（飯鍋裡的飯不太夠，煮一些麵吃好嗎？）